

光緒江西通志



裘率昆弟友生步山椒而登焉手彈絲桐目送還雲今

所謂琴臺石也弟及為之記祀名宦南豐縣志謹案舊志引豫章書誤

作獨孤及建昌府志則作獨孤巨今據縣志改正汜為及之兄其宰南豐見及所為茅亭記暨大清一統

志建昌府古蹟豫章書所記乃臆斷也

李崇瞻初為園苑副使後主八年升南城縣為建武軍

命崇瞻充營屯兵馬監押攝本軍制置公事值建軍之

始崇瞻創置有方百廢具舉識者嘉其通達治體云舊志

建昌府志

陳守忠南唐末為建武軍使禮賢士省稅刑闢田疇修

學校尤習軍事成有踐更漕運有程訓練有則民不擾

而事已集舊志建昌府志謝志原案馬令南唐書崇瞻守忠俱無傳在事歲月各志均失考又

陳守忠安志作守志李崇瞻安志府志俱作崇瞻

宋

王博文字仲明曹州人咸平開南豐令爲政平恕嘗語

其子曰平生決罪至流刑未嘗不陰擇善水土處汝曹

志之

嘉靖林志 舊志原案林志載宋名宦有孫寺丞

者失其名天聖中爲南城令李泰伯嘗爲文稱之

云民之瘡痍洗刷鍼療吏之宿憾奪諸其懷縮傲衣食

菜飲水晨而出暮不敢休與赤子爲父母貧人侈婦之

所竊笑守道君子嗟歎之不暇又徐殿丞亦

失其名亦嘗爲令南城李泰伯有贈行詩

江鎬開元人寶元初知建昌軍明於聽斷不爲羣議所

搖新橋梁薄征稅鋤奸革弊凝重若山

嘉靖林志

林志

慎鈇康定初以殿中丞知建昌軍理事決獄持大體不

事苛刻民咸戴之嘗作集賓亭李觀稱其樂善愛民爲

一時賢吏云

明一統志 建昌府志

周閔字夢臣衢州江山人寶元元年進士慶厯初任南

城主簿嘗取豪猾一二人繩以法餘皆斂迹不敢犯爲  
人和平簡易於政亦然及至有所必行人亦不能及也

元豐類稿

浙江通志

李秬臨邛人元豐中爲南城令政平訟理郡人呂南公

美之以詩

明一統志

陳繹元豐中以翰林學士出知建昌軍賓禮郡人呂南

公爲諸儒倡每謂人曰吾不以左官爲不可意而榮於

得灌園先生

明一統志

謹案宋史本傳繹字和叔開封人進士第以龍圖閣待制知江甯府

取建昌軍奪其職似繹乃建昌居

住非知軍也舊志久著姑存之

管師仁字元善處州龍泉人熙甯六年中進士第紹聖

中知建昌軍事有善政人戴其德爲立生祠

宋史一統志

楊傑字次公無爲人少有名於時舉進士爲南豐令拜

年政事修舉芝生於射圃人以爲善政之應云

嘉靖林志謝

志原案宋史本傳言傑官太常者數任一  
時禮樂之事皆與討論不載令南豐事

丁炎蘇州人元符初爲南城尉曾鞏嘗稱之曰丁君之  
佐邑人無不樂道之者余每觀良吏一傳反覆愛之如  
丁君之信於其邑於余傍近邑之所未見也故愛之特  
深

豫章書

盧知原字行之湖州德清人元符二年爲南城尉以材

見稱不曠其職

宋史謝志原案林志稱南城余家渡  
遇春水泛漲不可以舟民病之知原設

橋以通往來至  
今號盧公橋

劉滂字德霖婺州武義人大觀三年進士調新昌令豪

鄒氏橫里中挾貴嫺誣人死滂捕致械治之部使爲請  
不聽卒傳以法蔡京與滂祖爲布衣交滂至京師京欲

挽爲黨滂拂衣去建炎中知建昌軍建昌兵習悍驕要求無度滂至一以法繩之兵不勝忿持戟入市掠人物卽拒者刺傷之滂捕繫追償兵遂爲變滂及母妻皆死其妻湯氏侍姑側兵及身猶不去故遇害建昌人聞滂死慟哭失聲朝廷旣誅始亂者褒滂爲朝請大夫官其

一子

據宋學士文集補

趙公輔河南人紹興中以南城丞攝新城縣事政尙寬和不用鞭扑民皆樂從其令盜不禁而自息租不追呼而賦畢集

嘉靖林志

趙公旦汴人性剛果有爲紹興十二年爲南城令去惡如讐愛民如子尤加意人才創建學校民立生祠祀之

明一統志 建昌府志 謹案府志作趙旦就誤

承敷吳興人紹興十七年令廣昌寬和好禮時廣昌建

縣未久學校湫隘敷卜遷縣南規模輪奐

嘉靖林志  
建昌府志

胡舜舉字汝士徽州績溪人舜陟弟建炎二年進士紹

興中知建昌軍治本忠恕不輕以刑辱加民嘗憫快哉

亭於從姑山未成改官去民爲成之名遺愛舜舉曾修

盱江志歲久弗傳

嘉靖林志  
安徽通志  
建昌府志

曹進之衡州耒陽人嘉泰二年爲廣昌知縣甫下車視

學舍頽敝卽因止戈亭故趾闢而新之德惠滂流有金

芝嘉禾之瑞

豫章書  
建昌府志

崔與之字正子廣州人紹熙四年進士自淮西提刑司

檢法官遷知新城縣歲適大歉有強發民廩者執其魁

折手足以徇盜爲止勸分有法貧富安之

宋史  
謹案  
舊志誤作紹



興中爲新城令  
據本傳訂正

楊應廉字介叔廬陵人紹定五年以南城尉辟令南豐  
寇盜之餘加以饑饉應廉究心荒政以噢咻之屯兵之  
留戍者時給以餉使無乏於是兵不擾民而民得休息

南豐

縣志

木天駿字德遠温州瑞安人登嘉熙二年進士第初知  
閩縣有政聲後守建昌郡人包恢居政府族子倚勢漁  
獵小民天駿入境卽逮至黥竄之

據兩浙名  
賢錄補

曾埜寶祐六年知建昌軍經明行修能以儒術飾吏治  
修城池樹坊表重建盱江書院以育生徒復自葺盱江  
志時論稱之

嘉靖林志  
謹案舊志作開慶  
中知建昌軍據建昌府志改正

陳琥字少嚴一字恕齋福州連江人寶祐元年進士開

慶初知南豐縣痛繩羣吏嘗曰民不得安者吏爲之蠹也取巨猾吏曰三陳者斷手足以令於是胥役皆股票不敢肆百姓歡呼載道有問之者曰公以恕齋自號而竟不恕何也曰吾恕於民耳吏可恕乎識者以爲名言

嘉靖林志  
建昌府志

麋弁字仲昭杭州富陽人開慶中知建昌軍民詞數千立剖決皆洞見其情蠲未催苗三千餘石豪族有誣民爲盜者獄已具弁直之武斷之風遂戢歲旱露禱曰願降罰守臣毋流災百姓天大雨黃氏曰鈔

饒應孫

建昌府志作錢應孫字定之台州人象祖之孫

景定中知建昌軍嘗修

學舍及龜湖橋復盱江書院租置祭器立鳳山諸寨庶

政舉舉當時以爲能

嘉靖林志門有娶宗室女者

謹案府志云軍之南婦恣暴婢相

繼死非命至是又斷小婢兩足事聞  
應孫鞠實杖流之官至大府少卿

方演孫字景行莆陽人咸淳中知建昌軍以鹽酒息鐵  
錢代納民稅勤於興作而民不告勞有以知其政化之

大行也

豫章書

楊林字山立温州平陽人咸淳中攝南豐令事時邑頗  
羅寇林至殲其渠埽其巢穴塵市如故流亡來歸奏最

有旨再任士民安之

嘉靖林志

謹案舊志有曹觀蘇絨二傳觀傳惟載李觀一詩詞句  
頗不雅馴度亦率爾酬應之作且玩其語意殆兼勸勉  
未可即為政成之據今姑置弗錄俟有他書可證然後  
補之絨傳並見撫州言嘉祐初知崇仁縣此則以為紹  
興時人嘉祐距紹興七十餘年則近於不論其世宋史  
本傳絨仕仁宗朝死邑州之難神宗賜諡忠勇紹興時  
絨歿已久安得復為南城縣令則又似不知其人惟舊  
志述絨任崇仁之年雖不見本傳尚與其時相合或史  
有闕略亦未可知故今存撫  
州一傳而此則斷從刪削云

元

李孟古岱

原作李  
忙古歹

字叔信獻州交河人至元十四年知

南豐縣事縣初歸附兵燹後官民廬舍悉燬李孟古岱

至建置如初會閩寇突至統帥出兵招捕疑邑民爲貳

麾所部屯繞四門眾恇懼李孟古岱挺身出見帥垂涕

明百姓不叛狀帥疑釋闔城獲全

建昌府志

趙仁政山東人至元中建昌路總管興學校振士習選

吏懲奸勸農厚俗嘗修城東橋以利病涉往來者稱便

明一統志  
建昌府志

夏瓊字振玉德陽人至元中爲建昌路總管莅事嚴明

馭奸墨吏尤峻士民畏服遠近稱之

明一統志  
建昌府志

綽爾哈

原作綽  
兒哈

至元二十四年爲南豐州達嚕噶齊

原作

達魯花赤二十七年廣昌邱元作亂大率其黨陣於河田諸

鄉綽爾哈領眾拒之賊犯南門乘浮橋且半亟斷橋使

不得渡擊以矢石賊稍退會行省參政李世安至日夕

招捕賊遂平先是賊遣其黨來偵獲而戮焉故賊不知

有備而及於敗

據建昌府志補

胡長孺字汲仲婺州永康人元貞元年自揚州教授移

建昌適錄事闕官以長孺攝之程文海方貴顯其家氣

燄薰灼卽違法人不敢呵問其樹外門侵官道長孺亟

命撤之至大元年轉台州路甯海縣主簿

元史儒學傳

聶從政字伯達般陽人大德中知南豐州事民以訟牒

至者曲諭而遣之久而訟簡巡行境內必自齎糧甚清

苦而能持久歲旱步行禱雨修陂池興水利勸相有法

又教民種大麥親爲省視廉能之聲大著

建昌府志

王暄汴梁人延祐元年爲新城令性廉謹官俸外一無所取職田荒瘠暄奏請得減歲饑募粟以濟立義倉建

通濟橋築南津隄三里許民得免水患

建昌府志

薩特默色

原作薩德彌

泰定閒爲建昌守廉聲著於遠近吳

澄謂其旣優治政復虔教事爲民父母其善可書也

豫章

書

侯敬汴梁人元統中尹新城爲政廉明剛斷不可干以私增置都社以處戶口民有爲他邑誣指僞造寶鈔者眾洵敬疏白其冤在任三年頌聲如一以內艱去

據建

昌府志補

崔奉先至正中爲廣昌縣主簿時官吏貪墨奉先獨清

潔自好不妄取一錢城北有泉皎潔可鑑奉先愛之人

遂名爲廉泉據建昌府志補

明

梁伯達浙江平陽人洪武中任建昌同知志尙忠誠而

宣以威信遇旱誠禱隨獲沾澍郡有黨延等爲害伯達

嚴治之強暴屏伏嘉靖林志

林永齡福建侯官人洪武初任廣昌知縣在官清慎肅

然如布衣愛民如子惟恐失所民亦愛之如父母明一統志

張文琮浙江臨海人舉人洪武間爲新城知縣持己廉

慎歲大饑不待請報輒發粟以振遇旱齋禱雨立應他

邑有疑獄命往訊恆得其情尋擢知劔州明一統志建昌府志

謹案府志作建文初任與此不同

馮堅字公白南直隸通州人洪武二十三年爲南豐縣

典史初至榜於道曰遇上司非禮之行舒小民無告之

冤邑有周福一者與其黨二十餘人侵暴鄉里堅廉知

其實懲以嚴刑由是境內肅然民安訟息手書獄空二

字額於囹圄焉謝勝華之妻朱氏貞節婦也堅爲之特

請於朝復其家明年上書言九事帝覽而嘉之超擢左

僉都御史明史建昌府志謹案舊志僅錄堅上書

語焉不詳今改從府志堅以典史擢僉都爲有明

一代所希有故今典史署屏猶畫解豸以侈之云

李堅字景儀唐縣人洪武閒由御史左遷廣昌典史初

至卽取豪民强橫者十餘人繩以法眾皆帖然建昌府志

潘同浙江衢州人永樂元年令南豐莅政嚴密摘發如

神先是邑多盜同捕獲其渠曰韓高舉其罪坐之賊大



懾服三年盜息民安政聲丕著遷禮部主事

據建昌府志補

盧義字希正浙江淳安人洪武二十一年進士累官刑部郎中永樂五年出知建昌府以誠確愛民稱盧慈悲然寬而不縱豪強有所犯不少貸且曰今不慈悲矣秩滿民借留復任九載當遷以疾歸囊無餘資吏部侍郎洪璵嘗寄以詩云袍笏賣來供國賦詩書留得當山田

蓋實錄也

據浙江通志補

吳致文浙江平陽人永樂中知建昌府以官田賦重奏乞折徵布帛民甚便之

據一統志補

于潛河南鄆陵人永樂中知建昌府事性廉介不避權豪待吏卒以嚴撫黎庶以恩不踰年政平訟理

明一統志

盧坦湖廣巴陵人永樂七年任南城知縣剛果善斷庶

事畢集時閩寇攻劫鄉邨坦率兵剿捕殄滅無遺一時

咸服其威惠

明一統志

衡岳字世瞻河南汝甯人舉人永樂中以西安知府謫  
戍交趾仁宗嗣位薦授南城知縣宣德二年調南豐清  
操介然不以顛仆易節存心制行如古之循良興學校  
課農桑省刑罰絕請託官舍蕭條種蔬自給家人有愠  
色岳曰不猶愈於謫戍時乎厯官數十年操若冰玉何

文淵薦於朝擢桂林知府

建昌府志  
南豐縣志

陳鼎字重器廣東新興人初爲監察御史宣德五年命  
大臣薦京官有才者守劄邵鼎得建昌賜敕乘傳之官  
時民多桀驁鼎至治最强者十餘人始知畏法郡內稱  
治荆王府承奉蕭韶護衛指揮文斌怙勢暴橫鼎封章

上聞置之法於是官校斂迹四境晏然既報績超擢副

都御史

明史章書

一統志何東園集

豫

楊誼字純理山東濟甯人宣德閒任建昌知府性廉明

善斷郡有冤獄誼雪之奸頑斂迹均徭役興學校厚風

俗吏畏民懷郡稱大治

安志昌府志

建

陳員韜字從熙浙江臨海人宣德五年進士授新城知

縣斥蠹吏核富室詭匿之籍賦役以平毀淫祠二十餘

所聽訟明決鄰邑有不平者亦求直焉縣負郭田歲爲

大水浸沒員韜課民築隄種榆柳以爲固嘗上章乞以

廢僧寺田七十餘畝均給貧民復言民有爲荆王府校

尉者身死輒徵其次丁往代甚苦請自今止終其身帝

皆從之改知永新奸猾遠遁累官福建布政使

建昌府志

江通志

黎忠湖廣江夏人正統中任建昌推官閩寇攻陷鄰境忠選驍勇屢出奇計以摧賊鋒議者謂非忠則生民罹害易紀景泰初以功升本府知府

嘉靖林志建昌府志

江浩字敬大南直隸歙縣人正統十三年由舉人任廣昌知縣閩寇鄧茂七掠新坊官軍千餘人戰死浩集義勇樹濠柵爲守禦計寇再至再敗乃遁敘功升本府通判仍掌縣事一日召耆老詢之曰閱縣志廣昌初爲里八十有二今僅二十有四登耗何若是懸絕也眾以田歸豪右賦在貧民對浩卽選老人履畝覈之凡得羨田數千頃令計畝輸賦民大悅逋賦者日歸縣治瀕溪歲有水患浩築隄捍之樹以木歲久益固至今賴焉擢本

府知府秩滿升兩浙都轉運使據建昌府志補

楊清正統末為建昌所千戶閩寇煽亂廣昌令以警報

聞清統兵勦襲瀕行以鳳仙花染足指謂家人曰他日

尋吾尸以此為識後與敵戰果死之竟獲其尸豫章書

陳勉浙江建德人景泰元年知南豐縣事撫卹窮弱劬

豪猾不少貸百廢具舉政聲大著未三載以憂去民歌

之曰大尹陳政事新抑豪強撫良民男耕女織歌陽春

南豐縣志

陳陞直隸靜海人景泰五年知南城縣事性剛介人不

敢干以私陞家濱於潯南城民賈其鄉者必過其門不

敢齎一私書以見在任十三年亦未嘗挾一官物至家

也天順時考績入京疏陳時政上命議行豫章書

王儀南直隸常熟人景泰二年進士六年由御史謫南

豐典史重修儒學射圃廨舍增葺浮橋築東門河岸勸

率好義民不知費天順元年升三河知縣

建昌府志

謝士元字仲仁福建長樂人景泰五年進士天順七年

擢建昌知府地多盜爲軍將所庇士元以他事持軍將

奸發輒得民懷券訟田宅士元叱曰僞也券今式而所

訟乃二十年事民驚服訟爲衰止考滿進從三品俸治

府事如故以憂去服闋起知廣信府永豐有銀礦處州

民盜發之聚數千人將士憚其驍獷不敢勦士元勒兵

趨之賊遮刺士元傷左股裹創力戰獲其魁塞礦穴而

還入覲改永平厯官至巡撫四川右副都御史

明史謝志原

案安志士元在建昌府大新學宮作樂器祭器行射禮

購書萬卷貯講堂中公暇課諸生習業遂講求民間利

病又作敦化勸學表忠三圖繫之以詩有兄弟訟田者  
取圖詩曉譬諄切遂感泣相讓建李泰伯祠表黃孝子  
譚節婦之門倦倦以  
化民移俗爲務云

李麟字文祥順天懷柔人天順元年進士成化中知建  
昌府事性廉介家人無肉食者卒於官囊無鮮綺可斂  
止遺俸銀半錠民至今懷之

豫章書

方顯四川江津人成化八年進士十二年令南豐年少  
有才民有訟田宅者必親詣其所驗之每遇春作徧行  
郊原勞來勸相或微行市井以察民冤嘗奉監司命往

廣昌稽驗屯田軍民立辨廣昌人以爲神

據建昌府志補

袁士鳳廣東東莞人成化十一年進士十三年任廣昌  
知縣政令嚴肅賞罰必行詢求民閒利害積年訟獄悉  
爲剖決豪猾吏皆斂迹先是甯都豪民常擁眾至廣昌

縛人求賄士鳳密約法以待來者悉擒而重創之自是

民皆安帖

建昌府志 謹案袁士鳳舊志作袁仕鳳據進士題名碑改

秦夔字廷韶南直隸無錫人天順四年進士成化中知

建昌府事性清慎文章政事炳著一時首建曾南豐祠

堂李東陽爲之記累官江西布政使

嘉靖林志

莊英南直隸歙縣人舉人成化二十三年令廣昌值寇掠白水寨英驅兵禦之師潰死焉贈通判廕一子入監

讀書

據建昌府志補

高齊南四川內江人舉人宏治間任南城知縣時營建益府廣取軍民屋陞人情洶洶齊南親爲丈記償其價有願易官地者聽人心帖然暇則葺學校勤考課遇災歉悉心振濟多所存活九載遷任通判去之日老幼泣



送者載途

建昌府志

王祐山西祁縣人正德中知廣昌縣閩廣寇至民盡逃援兵又不至祐拔刀自刎其腹曰有城不能守何生爲左右奔奪其刀後援兵集賊稍退越七日復至祐倉皇

赴敵死之

明史忠義萬琛傳嘉靖林志

鄧俊字秀夫正德閒建昌所千戶嘗備廣昌盜至掖去浹旬不屈獲全歸焉姚源盜熾俊仍欲自效凡戰十數合皆利旣而馬陷泥淖中爲盜所殺事聞優給其子

書

羅江字孔殷雲南嵩明籍浙江會稽人正德九年進士十年任建昌推官性英爽嗜義若不及署南城令申改省城水兌禁軍校攔河革鹽鈔庫役皆民所便利卒於

官

安志 建昌府志

張燦字景川廣東順德人正德九年進士十年任廣昌知縣鋤豪理冤表揚先哲以氣節相崇尙遇寇警率先

登城士氣大振遷禮部主事

安志

曾璵字東玉一字少岷四川瀘州人正德三年進士十二年由戶部郎出知建昌府宸濠之變集義師會王守

仁於鄱陽合廣信知府周朝佐兵收復南康不自言功

遂以太守老著有少岷存稿

明詩綜小序謝志原案

法工古文詞作與儒行野士以文學知名者多與所甄拔曝書亭詩話云王新建定甯庶人之亂吉安府伍公文定固稱首功同時贛州則當塗邢珣袁州則武邑徐連臨江則臨海戴德孺饒州則晉江林城廣信則閩周朝佐撫州則鄞陳槐建昌則少岷也其師至雖有後先實同力共濟少岷有收復南康功而不見錄纂修地志者皆沒其實故表出之

余瑩字宗器南直隸婺源人正德十二年以舉人任廣昌知縣時邑經兵燹民人凋瘵瑩招集流亡蠲雜徵以蘇民困革隄備以除軍害修城築壩功倍前人稱其賢比於舊令江浩

廣昌縣志瑩建昌府志

謹案余作余瑩

蕭一中字執夫湖廣華容人正德十二年進士十四年任新城知縣始下車憤前政之敝擊搏豪強均平賦役治錚錚有聲先是歲編王府民校苦於承應或至破家一中請輸銀僱役著以爲令民困大甦南城妖民倡白蓮教惑眾將啟亂一中以計擒之禍遂息興學勸士百廢具舉厯官巡撫副都御史

建昌府志

葉良佩字敬之一字海峯浙江太平人嘉靖二年進士三年知新城縣事清節雅度專務以德化民延訪耆德

獎課生儒訟簡獄空百費俱節時有里役一年止用八錢之謠期年調貴溪時權璫督造真人府怙勢橫斂良佩一繩以法率斂迹不敢肆案牘叢委談笑而立決之

庭無留獄厯南京刑部郎中

安志 建昌府志 浙江通志

陳輞字子虛山東厯城人嘉靖五年進士六年任建昌推官性勤敏善斷嘗督造圖冊工省弊清前後有司無能及者署進賢豐城二縣篆俱著能聲

建昌府志

鄒堯臣字廷命雲南趙州人嘉靖五年進士六年任南城知縣邑遇水災捐俸振救全活甚眾值編丁長吏欲僞增戶口以要功堯臣力爭得免厯官江西參政

安志 建昌府志

昌府志

張紘南直隸上海人正德三年進士嘉靖八年爲建昌

知府臨事決斷如流人莫敢干以私政令簡便百姓輸賦外不入城府自奉甚約入覲時輕裝一葉而已

安志

祝繼皋字師謨浙江海甯人嘉靖二年進士十二年任南豐知縣時派上清宮僱役錢二十餘萬又派鹽鈔九萬六千貫有奇繼皋斥賣廢寺代民解納民晏然不知有科斂舊法徵輸煩瑣繼皋總核各項當出之數以便民至今謂之祝則

南豐縣志

向縞字清甫應天上元人嘉靖舉人二十年知南豐縣事縣有嘉濟廟淫祠也毀之改建紫陽書院取寺觀廢田歸之學積穀以防凶歲人稱其爲守兼優焉尋調光

澤令

南豐縣志

湯建衡字平仲一字懷南南直隸宜興人嘉靖舉人三

十八年知新城縣事守身廉約斷獄明恕時閩廣寇延江右殘掠邑境建衡誓死爲戰守計繕城垣備器械建環勝堂於城東選練驍傑布置城守夜躬巡城必三週無閒寒暑寇再至城下率邑民相機策畫竟卻之

舊志建

昌府志

徐文山南直隸銅陵人舉人嘉靖四十四年任南城知縣持身端正舊時庫子例以坊里供役官司日用無不取給者中人之產不逾月而盡文山首除之民賴以安

建昌府志

鄭秉厚字子載一字滄濂浙江遂昌人隆慶五年進士任南豐知縣時邑苦浙兵爲害秉厚自巡撫楊成奏徹之定均輸之法使富豪奸詭無所施民以安息擢給事

中遷江西參政

建昌府志

王之屏字汝藩一字介石南直隸潁州人嘉靖四十四年進士萬曆六年任建昌知府性廉澹公服外布衣自適故事官府日用多取給坊里之屏罷之馭吏嚴而有禮令賢否民憂樂纖悉皆知之嘗會按御史劉臺獄同事阿勢呵斥獨之屏憐其直臣每讞必起立爲白臺卒獲減戍累官雲南布政使

建昌府志

陳王廷字葑石浙江上虞人舉人萬曆初任萬載有聲八年調知瀘溪縣事時縣新建王廷旦夕拮据立城郭建廨署別市廛營學校政令嚴肅規模大定明年奉詔籍田王廷躬巡隴畝辨其肥磽以定則貧富悉均又於城外築隄以防暴漲民呼之爲陳公隄云

建昌府志

許孚遠字孟中一字敬庵浙江德清人嘉靖四十一年進士萬厯中知建昌府暇則集諸生講學引貢士鄧元錫劉元卿爲友尋薦擢陝西提學副使累官兵部左侍郎卒諡恭簡

明史儒林傳

孫楠字木所南直隸青陽人萬厯九年由歲貢生任廣昌縣丞居官有風力嘗驅猛虎出境擒巨獠置於法歲旱步禱烈日中雨立至邑人著三異錄以美之升興安知縣縣新立難治楠至勸農興學行練兵講武之政盜賊屏迹良民大安

江南通志建昌府志

毛在字文源南直隸太倉人萬厯二年進士十二年任建昌推官性明達遇事立斷當道有疑獄率以屬之幽隱必晰一時稱爲神君平居官舍蕭然人所不堪而在



處之自若獄無贖鍰筆札皆自辦當道益歎其廉

安志

孟一脈字淑孔山東東阿人隆慶五年進士

原作萬厯進士誤

以南御史建言謫建昌推官嘗微行窮鄉廉得巨猾置

之法一郡肅然累擢僉都御史巡撫南贛

明史建昌府志

葉世德字有懷浙江樂清人舉人萬厯十一年令廣昌

冰檠自矢益藩新置王莊民稱不便世德徑申文止之

新學校創義倉設橋梁與民興利先是余瑩爲令有政

聲至是民有前余後葉之謠

據建昌府志浙江通志補

章宗禮廣東新會人舉人萬厯十九年任新城知縣時

方議行四差八差之法宗禮悉罷之清丈田賦躬履阡

陌人無敢爲奸者

新城縣志

謹案建昌府志作章宗埋字懷槩黃梅舉人萬厯六年任

胡明佐字拱柱福建同安人萬厯二十年進士任南城

知縣實心愛民不事虛譽歲癸丑洪水暴漲淹沒者萬家明佐瘞亡恤存民感之如父母重建太平橋以利行者力行均糧之法著權宜永猷二書後人梓行之其惠

尤永云

建昌府志

楊武烈字澹中南直隸欽縣人萬曆二十年進士二十一年任建昌推官課士論文有人倫之鑑決獄多所平反署郡事罷關稅巡攔之役羨金無所取廉明之聲大

著

安志

薛克炫字涵字廣東博羅人萬曆二十四年令瀘溪清操自勵豪右虐鄉里者懲弗貸閩盜越境竊發迹之急則遁去怠則復至克炫計擒其魁盜遂息後忤當道罷職猶以蠲免帑金給還百姓故老言廉吏者必首克炫

馬

據建昌府志補

韋孚獻福建晉江人舉人萬厯二十五年知新城縣事清操勁節視民如子而治豪貴之不法者無少貸郡守

憚之目之曰韋鐵面

安志

樊玉衡字棠軒湖廣黃岡人萬厯十一年進士除南城令爲政舉要領罷猾保馬快誅豪蠹之巨者終其任民不敢犯中璫以採礦至縣玉衡宣言無礦力與璫抗民從者千餘人璫氣奪乃飲璫酒璫持玉衡手曰好手玉衡曰無他好但不捉民間錢耳璫默然徐語公何自苦衡曰令與公皆飲食百姓百姓不苦而令苦乎公幸無苦百姓語竟泣下因導璫入險爲文告山靈有礦當吐符陳貢不然而令與璫藉口括金以爲民禍神其殛之

璫懼而去

湖廣通志

葛文炳字星垣浙江鄞縣人舉人萬曆二十九年任南城知縣宗藩支庶與民爭利文炳謁益王陳其弊王禁之乃戢縣南有二十七山供百姓樵牧奸民藉王府建塋踞之文炳立石清其界常乘一小輿行阡陌閒以時主水啟閉建水倉立社學除毒草便征輸在縣六年治行第一遷大理寺評事以疾歸

據建昌府志補上者舊傳補

馮日望字見中一字未庵浙江慈谿人舉人萬曆二十九年知瀘溪縣事縣多盜日望仿趙廣漢笮笮法令民得盜蹤則入詞其中以告遂獲盜首誅之繼乃行保甲法使民自稽盜無所容匿邑境以安益藩內校假王勢索富民錢日望禁之藩邸稅與民共圖民大以爲苦日

望請於王得別立圖民乃不病暇則進諸氓舉鄉約之

制親爲講勸民俗爲一變焉

據建昌府志補

高江字襟之浙江仁和人舉人任新城知縣新城多巨

猾善持短長江以法繩其魁瀉俗頓革采風謠察疾苦

條上十四事於臺司著爲令請謁賂遺及贖鍰奇羨皆

杜絕之嘗覽訊牒有文某搃殺王女事一夕夢女跣訴

詞惟駟斐二字江乃悟殺人者馬四非文也庭質果款

服有婦誣人殺其夫坐辟久江閱爰書曰實婦殺之也

脅骨已折安能行五里許而歸婦具服有理刑欲中傷

之卽日移疾歸

據浙江通志補

陸鍵字開仲一字實府浙江平湖人萬厯三十五年進

士任建昌府推官郡與閩接壤閩鹽值不及淮鹽之半

販私者多貧民藉活朝夕往往觸禁至死鍵言於大吏  
請得比廣信食浙鹽例改食閩鹽大吏將許之卒爲淮  
商所格寢不行奸民盜葬他人山侵其舊冢習最惡鍵  
大創之風乃稍息其餘均糧清運之事士民尤頌之云

舊志 建  
昌府志

鄔鳴雷字長豫一字齊雲浙江奉化人萬曆三十二年  
進士任建昌知府峻風裁愼請託益藩吏役不法者懲  
弗貸郡固有太平橋稅輸內帑奸民窟穴其中鳴雷廉  
得之置諸法湓額遞免商民稱便稅璫利其羨餘馳傲  
親權鳴雷力折之璫竟氣奪而去他利弊當興革者皆  
與推官陸鍵議行之尤加意造士捐俸置六學義田以  
給諸生在任四年轉江西布政司參政分守湖西尋以

母病請歸卒於家

建昌府志

吳麟徵字聖生一字磊齋浙江海鹽人天啟二年進士除建昌府推官擒豪猾捕劇盜自署廳事云寒骨山堅宦情冰冷後官至太常少卿李自成薄京師麟徵奉命守西直門城陷自經死贈兵部右侍郎諡忠節

國朝賜諡貞肅

明史  
白志

吳之屏字諤齋浙江崇德人天啟二年進士初知新城縣有惠政五年調知南城時豪猾相聚劫掠之屏廉得主名抵縣卽擒其魁置之獄餘皆逃散爲政清簡獄無冤囚及遷去士民各建祠立碑以志去思

建昌府志

楊榮福建同安人崇禎四年令南城善撫奸蠹歲饑設法振救躬行郊野撫恤如子女妖賊周八起宜黃屯南

豐新城戒嚴榮日夕練士以備賊不敢窺在任六年坐

事罷邑人咸惜之

據建昌府志補

王璽字爾玉湖北荊門人舉人崇禎五年令廣昌爲政務舉大綱大姓陵虐鄉里懲其尤者餘皆畏服蠶民稽命案爲利多引富族璽立法禁之風乃息會南豐封山寇警璽增修城壘守禦器械皆備民恃以安

據建昌府志補

林壽芝字蘭谷廣東惠來人舉人崇禎十年令南豐初鉛山妖人張普微倡密密教聚眾謀不軌南豐周八江義據宜黃封山應之陷瀘溪宜黃南豐賊相繼蠢動郡邑戒嚴壽芝至與官紳議請兵會勦懾以虛聲而先以計獲偵卒五人斬之已而兵四集壽芝以封山地圖授諸將分道進勦周八江義張普微等俱以次就擒先是



嘉靖丙辰閩廣流寇犯南豐臨川令林潤以他事奉臺牒至入城共保相拒七晝夜斃二賊渠賊乃遁民祠祀之至是民肖壽芝像與潤合祀號二林公祠潤莆田人

自有傳

據建昌府志補

李恢先字又青南直隸金壇人崇禎元年進士十一年知建昌府事會封山妖寇作亂郡邑戒嚴恢先遠斥堠勤譏察以計獲賊黨籍按姓名捕誅之益王執蓋士亦其黨謀刺王以應至是亦被誅賊內應絕遂驚遁不敢復窺郡城又助王增城浚隄請兵會剿不數月而亂悉

平

據建昌府志補

王域字元壽南直隸華亭人舉人崇禎甲申由工部郎中出守建昌加副使以清正稱乙酉六月與布政使夏

萬亨副使王養正推官劉允浩南昌推官史夏隆奉益

王起兵七月大兵破建昌執域等至南昌皆不屈死

允浩字集生山東掖縣人崇禎癸未進士

一統志南疆佚史

李翔字颿舉福建邵武人以鄉試副榜貢入太學唐王

時知新城縣事大兵將至翔召募義勇日夜戒嚴親

率千人入演武場督戰大兵已從他道馳入義勇咸

散從翔返者僅三十人比至城則留者三人耳翔直前

斬三級而出顧謂三人曰汝等可去我入城死矣策馬

復入大呼曰我新城令也兵執之送建昌不屈死

據一統志

南疆佚史補

### 國朝

劉承宣浙江山陰人順治十二年任瀘溪縣典史時山

寇初平邑民流散存者亦多凋瘵承宣加意撫恤贊襄  
政治民稍稍歸業邑令李國維卒縣事多倚辦於尉明  
年有閩師之役下令徵民夫邑人皇恐承宣請免不許  
遂慟哭乞哀曰瀘民自遭寇禍居室寥寥可以指數今  
復徵之不盡死溝壑不止也請先民死以明不欺卒罷  
徵夫之役

建昌府志

侯見朝未詳何許人爲建昌營千總備禦廣昌順治十  
五年九月陽石砦賊出掠遠近長驅圍城東北門眾互  
數里見朝率二十八騎潛出南門閒道繞賊後張幟鼓  
行而前賊疑援兵至大駭城中民開關夾擊賊大敗追  
奔十餘里斬首無算後從知府高天爵破賊砦先登功

復第一

建昌府志

狄宗哲字魯修河南鹿邑人順治九年進士十五年任  
建昌府推官斷獄明慎時有逆丁妄引平民爲軍戶宗  
哲請釐正軍冊以除民病勒其事於碑

安志

李正蔚江南盱眙人順治九年進士十五年任南城知  
縣才識敏達卓然有爲邑文廟隘陋正蔚增修之煥然  
改觀民間利弊力可興革者亦罔不盡心焉卒祀名宦

建昌府志

張黼鑑字曲江陝西延安人歲貢生順治十五年令南  
豐邑四十六都羅寇最甚田畝荒蕪黼鑑寬其征民感  
泣爭持尺布斗粟以償設法經理其額遂足廣昌陽石  
砦據於賊或謂南豐民與賊通將加罪黼鑑力爭之卒  
白其誣黼鑑抱文武才每軍將過邑引與較射皆情服

無敢擾閒作詩古文時流交相傳誦後以舊通報罷歸

建昌府志

高天爵字君寵漢軍鑲黃旗人世居鐵嶺由廕生歷官湖南長沙知府順治十六年調建昌先是廣昌縣山賊王昂等聚黨數千時出劫掠官軍屢討不能平十八年五月天爵與巡道張永祺參將王之佐定計進攻毀其巢盡擒諸賊黨十年砦賊一夕掃除部民皆尸祝之康熙十三年逆藩耿精忠叛縱黨入江西犯建昌時天爵已遷兩淮運使或勸之速行天爵曰吾守此土十六年雖受代忍遽離乎且念建昌破則南昌危因請兵自將防其西出徵壯夫繕城垣躬擐甲自禦賊城東萬年橋城守副將趙印已降賊乘天爵力戰從後縛之以獻賊

載送入閩不屈死事

聞贈太僕寺卿四十六年

賜諡忠烈雍正四年加禮部尙書銜七年入祀昭忠祠

本傳自志

吳景祉字二來湖北興國州人順治十二年進士十七年知南豐縣事不輕笞人不苟自潤或勸之則曰視作秀才時何如而尙求贏也及罷官貧不能治裝子甫生領解始歸里年八十餘卒

湖廣通志

張含瑾字荆涵山西蒲州人順治十六年進士康熙元年任建昌推官檢視案牘夜分不倦訟獄以片言折之咸讐服大豪黃某睚眦殺人捕置獄暮夜餽千金祈緩不許卒服其辜

山西通志謹案張含瑾進士題名碑作陝西潼關人

周宏祖字微凡順天人康熙四年知南豐縣事時清丈

令下宏祖處以平恕田賦悉清復創立鄉收法里各爲編使不相混至今便之邑有巨盜李泄將肆毒宏祖捕置之法餘黨遂解散

南豐縣志

高首標字呂梁山西永甯人順治十六年進士康熙五年令廣昌以內艱去十五年服闋謁選先一夕夢得廣昌已而果然郡初恢復屬邑尙不靖首標至卽詣帥府自陳願不假兵威往撫單騎到縣僞將遂降大兵征閩過廣昌首標捐資勞軍民以無擾豐瑞藤弔兩砦負固首標諭下之驛前兵民相鬪一兵傷幾斃鎮將將以叛誣民召首標具狀首標長跪請命不聽且促之乃曰令頭可斷民不可誣也密遣人縛毆兵者詣軍前曰罪人已縛帥怒遂解在任七年擢吏部主事卒於道

一統志

舊志

張名顯本姓陸浙江紹興人占籍蘭陽康熙六年任南  
豐典史潔己恤民時邑令治獄多濫名顯請釋不能得  
乃振其饑寒寬恤甚至府遣吏糾事賄不遂輒請拘禁  
之名顯不聽邑西鄙多逋賦令以屬名顯名顯單騎往  
減耗羨自炊以食賦遂清卒於官諸生曾曰善譚榛義  
而助之喪乃得反

建昌府志

曹養恆字右河陝西蒲城人舉人康熙十一年任南城  
知縣南城賦斂圖分十甲甲十年出役催徵謂之里長  
九甲之丁糧悉責收於一人於是奸民託爲代納蠹吏  
更易多寡以欺愚弱而里長破家不足以償累養恆閱  
之立滾徵法使有田者得自納賦於官罷里長懲蠹吏



百姓如出湯火至今食其德

建昌府志

舒學文浙江蘭谿人康熙初任廣昌白水司巡檢十三年耿精忠陷建昌學文從官兵進剿降偽游擊陞額後等又往河東招偽副將何承統承統不受命學文還至縣南新陂塘賊追執不屈死之僕三人亦同死事

聞贈江南金山衛經歷廕一子入監讀書

建昌府志

陳貞字吉人一字介麓浙江鄞縣人監生有才略初授上饒縣丞康熙十四年從安親王恢復建昌題授廣昌知縣時廣昌猶爲賊所據貞駐南豐已而南豐亦陷貞與南豐令丞同被執不屈死之事

聞贈按察司僉事廕一子

建昌府志  
鄞縣志

王應魁奉天錦州人康熙十四年知南豐縣事時耿精

忠叛閩所在山寇響應魁率家眾與鎮兵分城而守  
鎮將縱飲不爲備城陷應魁死之事

開贈按察司僉事予祭葬廕一子

建昌府志

馮鈺字子堅四川梁山人舉人康熙四十一年任新城  
知縣潔己奉職一切屬民之政革除殆盡縣胥舊至二  
百餘人鈺汰其半諭使還生業民有事雖至小令前自  
盡必得其情而後已待士紳嚴而有禮無敢以私干者  
歲旱齋戒祈禱夜不寐平明登城望雲氣聞屠豬聲歎  
曰令不德不能取信於民乃弛屠禁自齋宿城隍廟翌  
日雨大沛四野歡聲雷動旋以分校卒鄉閭中民爲巷

哭罷市

建昌府志

王鉞字子俊浙江仁和人例貢生康熙四十五年知瀘

溪縣事愛民禮士黥墨巨盜四境肅然瀘溪水多淺歲漕艱於轉運鈇請徵銀罷運格不行乾隆初其子文濬官御史以鈇遺命請於朝卒罷漕改折邑民永被其惠

建昌府志  
瀘溪縣志

李朝柱字東崖山西臨汾人監生雍正二年官建昌知府才識明敏喜任事在官三年建義學修樓櫓營試廨改天主堂爲縣倉百廢具舉丙午福建饑江西運米協振道新城朝柱悉心經畫凡小舟自硝石載米至五福鎮者許載貨而返其自五福鎮肩米至光澤者亦如之於是舟子舁夫皆踴躍趨事水陸運米數萬大著能聲尋以疾卒士民咸惋惜焉

建昌府志

黃允肅字元靜一字思亭福建晉江人雍正元年進士

九年任廣昌知縣縣故瘠地逋賦縈縈郡守至縣械逋戶將盡繩以法允肅固請展限不足然後徵之民歡呼曰黃公恩不可負也如期畢償邑學溪苦淤塞允肅從數十里外堵截沙石溪水自流西關城屢齧於水砌石隄數百丈以障之在任九年行取主事尋以事累免官後允肅自省至廣昌父老數百人遮道迎擁入城其歸也民皆涕泣雨下

建昌府志

楊宏志字心齋漢軍鑲紅旗人乾隆六年任建昌知府故事知府受獄詞委首領官宏志獨坐堂皇閱牘可疑者立詰之自辰逮申以爲常夜燭治文書必盡晰端委署尾下羣吏訖然後已嘗曰民不幸有事至府遠者數百里待一日奸胥多一日需索逆旅多一日繁費民何

以堪邪卒於官

建昌府志

徐振修四川崇慶州人舉人乾隆七年任新城知縣民有訟懸囑立斷務厭其心無情者舉不得逞歲凶勸分施振有加兩閩童子試並絕請託所拔皆一時之俊調南城再調瀘溪教民以竹篴培堰歲減土工萬餘民被其澤至今稱之

建昌府志  
四川通志

郭廷翁字虞受一字根庵山東卽墨人舉人初任宜春知縣察奸剔蠹獄無冤滯乾隆三十五年調知南城能以廉明服眾甫三載獄訟希簡無案牘之擾尤折節下士見儒生諄諄以篤行實踐爲助手自課程多所成就一時有山左三清之目謂廷翁及知府王祖肅同知安

洛德也

建昌府志  
袁州府志

賈文召字櫻峯甘肅伏羌人舉人乾隆五十四年知瀘溪縣事鋤暴恤民治劣衿不少恕胥吏囂氣盜賊潛蹤尤精於聽斷案無留牘奸民不能售其欺居三年調知南城頌德政者不絕

建昌府志

李蔭樞字石溪雲南呈貢人嘉慶十年進士十三年任新城知縣乙亥冬瀘溪奸民陶省三謀亂蔭樞先事豫防微服偵察累晝夜民皆案堵如故既而省三誣新城有同謀者蔭樞力白之得免株累二十二都鄉民爭水久不決親往勸諭案乃定溉田千百畝言水利者稱之調新建升蓮花廳同知

建昌府志

張澍字介侯甘肅武威人嘉慶四年進士改翰林院庶吉士散館以知縣用歷貴州玉屏四川屏山知縣以憂

歸服闋任江西永新道光八年題補瀘溪知縣澍才學博瞻性情亢厲表表樹風節及官瀘溪震懾豪強奸民惡胥皆股栗不敢逞片言折獄煥若神明然持躬獨廉潔甚終始愛民有關利病者無不爲也瀘溪於明始爲縣士或未習於古澍重修鶴城書院課以明經致用之學又撰茂學篇以詔之厥後都人士服習其訓文氣遂

蒸蒸日上云

建昌府志瀘溪縣志

曾興仁字壽田湖南善化人舉人道光十一年任廣昌知縣下車首發蠹役姦弊禁瀕河民私取草樹以防沙壅歲旱米貴招商販運勸富民出粟平糶民無菜色賞輕車周歷鄉邨舉行保甲課民種植之事山僧野叟皆得持楮版索書遇有爭訟卽數言判決咸悅服而去不

令入城待質也去官後士民歌頌成帙

建昌府志

諸葛槐字莘臣浙江蘭谿人拔貢生咸豐四年知新城縣事甫下車鋒稜嶽嶽不可犯邑諸生某爲前令所瞋信槐至投刺紳室獨不及某人以是憚其風采諸紳謁者款以禮稍涉私則婉謝之惟諮訪民閒疾苦甚至閒有闕失愀然動容待胥吏不少假詞色猾胥某侵鄉民税金病其責償於已也陰嗾其仇訐之胥反持白契相要挾槐廉知其情置胥於法厚撫鄉民而歸之其嚴仁類此六年七月粵寇來攻槐率紳民登陴設守城陷赴井死

開贈卹如例建專祠祀焉

建昌府志

隋藏珠字龍困山東樂安人道光十五年進士咸豐十



年由戶部郎中出知建昌府性廉介尤刻厲布衣疏食從者不過數人事上官無私饋遺接吏民無私請謁風俗奢靡必力禁之勤聽訟有白事者即呼入面詰親書詞判不假胥吏無不曲當其情民無羈留糜費之苦在郡一年以檄司大營糧臺去官士民遮道哭泣輿不得前乃解所服布袍以贈曰留此以志去思遂名其地爲

留衣橋云

建昌府志

宦績錄十一

廣信府

唐

楊光翼先任婺州長史肅宗置信州制以光翼爲守治

有惠愛歿後民懷之立祠祀焉

嘉靖林志

裴倩字容卿絳州聞喜人歷信州刺史勸民墾田二萬

畝以治行賜金紫服代第五琦爲度支郎中卒謚曰節

唐書

孫成字思退博州武水人爲信州刺史歲大旱發倉粟以賤直售民民饑而不害再期增戶五千優詔褒美徙

蘇州

一統志  
舊志

常曾爲信州錄事參軍韋應物作古鼎歌贈之云三年糾一郡獨飲寒泉井江南鑄器多鑄銀罷官無物惟古鼎蓋喻其清也

韋蘇州集

宋

章得象字希言浦城人進士及第知玉山縣累遷知洪州得象令玉山時有惠民立祠祀之官至鎮安軍節度使封郇國公卒謚文簡

宋史  
一統志  
明

榮宗範任城人真宗時知鉛山縣曾有詔罷縣募民採

銅民散為盜宗範請復如故據一統志補

滕宗諒字子京河南人由尚書祠部員外郎知信州政

尚平簡重風化留意學校累官知蘇州卒宋史林志嘉靖謹案

宋史本傳附劉越事刊本誤以越提行舊志不察遂謂無知信州事實則讀宗諒傳未竟也

方蘋字仲禮嘉祐間以大理寺丞知鉛山縣事鉛山俗

尚鬼病者聽於巫不事醫藥蘋力禁之歲旱禱雨鵲湖

神雨立至劉輝為文記其事廣信府志

李及之字公達濮人迪弟之子由廕登第知信州時靈

鷺山浮屠多不法及之治其姦流數十人乃自劾朝廷

嘉焉豫章書

晃宗恪字世恭祥符人先知虔州州近粵多盜與訟宗

恪至修廢舉墜禁抑豪強威信盛行盜不敢發而獄無繫囚熙甯元年知信州一如虔州所至人皆安其政去

常思之卒於官

舊志

王愈字原道初名悰徽州婺源人登紹聖元年進士丙科令建昌歲饑民聚爲盜立法振濟所活數萬人以功薦於朝政和二年任滿賜對垂拱殿稱旨改賜今名令知信州宣和二年十月睦寇犯信愈奏用鉛山宰王舜舉監鑄錢高至臨同治兵事賊攻城不得志稍退屯柳家都至臨率銳士銜枚火其營賊狼狽走愈縱兵蹙擊大敗之縛其僞總兵賊遁去上降詔嘉獎除祕閣修撰賜金紫

宋江藻浮溪集

元洪焘祖續新安志

謹案

文獻志所引

洪志改撰

蕭振字德起温州平陽人登政和八年進士第調信州儀曹時州郡奉神霄宮務侈靡振不欲費財勞民與守議不合會方臘寇東南距信尤近守欲危振檄攝貴溪弋陽二邑旣而王師至衢又檄振督軍餉振治辦無闕大將劉光世見而喜之欲以軍中俘馘授振爲賞振辭曰豈可不冒矢石而貪人之功乎諸邑盜未息守復檄振如初振悉意區處許其自新賊多降者守以贖去振獨爲辦行守愧謝之調婺州兵曹厯敷文閣學士

宋史

黃袞字季章温州永嘉人知玉山縣事有惠政嘗奉檄

出境人皆驚憂以爲遂去及還老幼歡呼迎之已而任

滿請留不獲乃就邑之智門寺立祠繪像祀焉

明一統志

葉容字子昂興化軍仙遊人登紹興元年進士知貴溪

縣事時詔行經界郡議以上中下三等定田稅容請分爲九等守從之令信州六邑以貴溪爲式累官尚書左

僕射

宋史

陳局建甯人紹興中以左朝散大夫通判信州軍上謀欲爲亂局制禦有方尋除知信州事

明一統志

黃延年字曼卿知永豐縣事紹興四年秋盜起延年授

尉方略討平之民乃安

嘉靖林志

沈介湖州人乾道四年知信州事與趙師嚴爲代師嚴在官時州兵嘗舉往例欲有所求請不獲遂謀亂雖散府庫以撫之猶未能定介至誅首領二人餘皆案堵如故歲饑振貸有方民得免死徙移知溧州老稚扶攜隨行不忍舍者數十里

嘉靖林志

徐畧字大崇乾道間為永豐令邑有烏石灘勢險惡為民患畧鳩眾鑿之始平歲大饑勸民出粟平價以濟民有為盜者戮其首惡眾賴以安

明一統志

張子顏乾道中知信州事明察果斷閭里隱伏皆知之盜賊屏息路不拾遺

明一統志

葉匪躬字正之為永豐令多善政縣東權陂久廢匪躬一意修復灌溉之利今猶賴之

明一統志

蔣億字仲永義興人淳熙間知鉛山縣以斯文為己任建學置田立僦舍給弟子員二十餘人令學焉億才高志遠蓋嘗有意立功當世其治一邑固綽綽然有餘

廣信府志

吳博古字敏叔旣陽人淳熙中知貴溪縣事修學校延

師儒於署東偏作敬齋陸九淵記之曰吏肅而事未始

不治民蘇而公未始不足姦治直伸民莫不悅

陸象山集

曾從龍字君錫泉州晉江人初名一龍慶元五年擢進

士第一始賜今名知信州戍卒行掠境內從龍寘之法

索得婦人衣命梟於市紹定中知隆興府端平中以樞

密院使督視江淮荆襄軍馬卒贈少師

宋史

潘友文字文叔婺州金華人開禧閒知永豐縣事政尚

寬惠推誠撫民時役法累民甚友文曲爲均調使不至

困去官後民爲立祠

豫章書

趙彥彬慶元府鄞人開禧元年進士嘉定閒爲貴溪令

律已清廉寬以恤民嚴以御吏嘗書座右曰俸薄儉常

足官卑清自尊及代去百姓遮道攀留涕泣以送

明一統志



縣志

章謙亨字牧叔吳興人紹定閒知鉛山爲政寬平人號

生佛家置像而祀之其興學養士禦盜安民禮賢表俗

蠲賦救荒諸事邑人勒之章巖志勿誼焉

廣信府志

趙與勲端平閒以朝散大夫知信州事抑强梗免苛征

治河梁驛舍之就頽者剡除諸積弊學校尤號得人

明志

丁黼端平中知信州事未數月循良豈弟之政流聞四

方真德秀特疏舉之

廣信府志

章鑄杭州錢塘人淳祐閒以朝議大夫知信州多所興

作諸廢罔不舉嘗輯上饒志成自爲之記

明一統志

石純臣紹興人知玉山縣事强立不畏人弗敢干以私

每閱訟牘遇誣罔則以筆乙出之發奸摘伏如神明然

廣信府志 詳案謝志引明統志漏書知玉山縣竟不辨純臣所任何官今改從府志

李由字民哉台州人知玉山縣以直道自任不受請託

斷訟明決日坐廳事聞重門洞開上下之情罔有不達

明一統志

柴景望理宗朝知弋陽縣強毅自立決獄一出至公嘗

編立義役法優恤戶長人情翕然稱賢令廣信府志 舊志原案真

西山奏議薦江東路知縣事有成績者十人景望與玉山令程榆與焉

程榆理宗朝知玉山縣慈祥愷悌有循吏風值洪水驟

至榆方疾力起巡行撫勞權宜發官錢以振不俟申請

民賴以蘇廣信府志

韋能千字叔能杭州錢塘人淳祐中爲玉山丞性廉介

楊有中有田產隸玉山常致餉於長吏甚腆能不卻受而附諸縣庫在官與東里趙渙游獨厚每過其廬清談竟日止對酌卮酒而去言不及私

據浙江通志廣信府志補

趙逢龍字應甫慶元府鄞人嘉定十六年進士歷知信袁等州每至官有司例設供張悉命撤去日具蔬飯坐公署事至卽面問決遣政務寬恕撫諭惻怛一以天理民彝爲言民不忍欺常奉外一介不取民賦有逋負悉爲代輸尤究心荒政以羨餘爲平糶本遷宗正少卿兼侍講卒

宋史

唐震字景實會稽人咸淳六年江東大旱擢震知信州奏減綱運米蠲其租賦令坊置一吏籍其戶勸富人分粟使坊吏主給之吏有勞者輒奏復其身吏感其誠事

爲盡力所活無算州民庸童牧牛童逸而牧舍火童父  
訟庸者殺其子投火中民不勝掠自誣服震閱牘疑之  
密訪得童示其父獄遂自十年知饒州時興國南康江  
州諸郡皆已附元饒兵止千八百人震發州民城守味  
爽治兵中夜始寐上書求援不報元兵使人取降款通  
判以下皆陰斂所部白金牛酒以待饒寓士皆從之震  
獨矢不負國及城陷兵入府展牘案上使震署降震擲  
筆於地不屈遂死之贈華文閣待制諡忠介廟號褒忠  
官其二子

據宋史忠  
義傳補

張孝忠道州人生有膽略通兵法宋之將亡也文天  
徵義兵不至孝忠發憤鳩集數百人聞謝枋得知信州  
遂往從之枋得授以帳前提點元兵至饒州由貴溪入

信孝忠督兵安仁沿水列柵爲固守計寇至逆戰死之

歐陽元撰廟記 廣信府志 謹案府志原誤其名作

忠孝且誤據宋史謝枋得傳淮士二字以爲淮安人今

並改

正

謹案舊志有袁甫傳今改入統轄以其官爲江東提刑  
非守信州也

元

布喀齊鴻吉哩氏世居應昌世祖時授宣威將軍信州

路達嚕噶齊時江南初附布宣上意與民更始期年郡

中大治部使者以聞帝獎歎久之遣使賜以上尊俄以

疾卒年三十三

據元史  
本傳補

盧天祥至元中爲信州守興學校崇詩書暇日嘗延儒

生講論治理復撫六經圖於石立兩廡下

明統志  
謝志原案林

志作虞天

祥許昌人

王禎字伯善東平人大德四年知永豐縣事以課農興學爲務常買桑苗及木棉子導民分藝遇旱或淫雨必齋以禱罔敢少怠著有農器圖譜農桑通訣諸書嘗刊於廬陵云

元詩  
小傳

劉伯淵字巨川大都人大德中知永豐縣事縣頻歲早饑伯淵禱雨輒應抑豪強恤孤獨豐於養民而嗇於自奉人至以劉淡菜目之謂其罕御梁肉也

廣信府志

林興祖字宗起福州羅源人至治二年進士三遷知鉛山州鉛山素多造僞鈔者豪民吳友文爲之魁遠至江淮燕薊莫不行使友文奸黠悍鷙因僞造致富乃分遣惡少四十五人爲吏於有司伺有欲告之者輒先事戕之前後殺人甚眾奪人妻女十一人爲妾民罹其害銜

冤不敢訴者十餘年興祖至官曰此害不除何以牧民  
卽張榜禁僞造者且立賞募民首告俄有告者至佯以  
不實斥去又有告獲僞造二人并贓者乃鞠之款成友  
文自至官爲之營救興祖命併執之須臾來訴友文者  
百餘人擇其重罪一二事鞠之獄立具逮捕其黨二百  
餘人悉寘之法民害旣去政聲藉甚江浙行省薦諸朝  
升南陽知府遷道州路總管致仕

元史良吏傳

壽安至正中監玉山縣事創立書院敦勵士行毅然以  
絃誦爲教在任未久百廢具興後以領兵討賊死於難

廣信府志

宋詳字約夫東平人至正間知永豐縣事莅政數月興  
學校務農桑築陂塘以備旱潦陵陽寇至率兵禦之民

賴以安

像章書

張良材福建人爲貴溪尉有武勇至正壬辰之亂集義兵保障一邑時江浙左丞軍至信州良材以義兵接應一夕敵大至圍營數重良材挾雙刀單騎突圍出旣復遇敵入深阻伏發馬蹢遇害

嘉靖林志

于大本字德中密州人由儒學教諭厯信州路總管賊犯信州大本以土兵禦之被執至蘄水不屈死

元史忠義魏中

立傳

王簡字伯敬霑化人家湖州烏程至正中爲信州路推官升福建都轉運副使將行會紅巾賊且至州民擁馬首乞留乃壘四門簡精銳諭鄉民團結自保頃之賊分道入簡率仲子相引兵與戰敗之居數日賊復突入簡



奮身力戰俄而馬中流矢遂被執不屈嚼舌噴血賊面  
大罵賊怒殺之立而受刃頸斷湧白液如乳不仆數日  
面如生相亦不屈死相妻潘及其二女俱死焉據浙江通志補  
王巴延原作王伯顏字伯敬濱州人由湖廣省宣使歷烏程  
尹遷信州推官數辨冤獄全活甚眾至正九年遷知福  
甯州賊偪福甯爲賊所執不屈死贈嘉議大夫濟南路

總管

元史廣信府志

謹案舊志有辜中傳已見南昌府列傳今刪

明

徐中浙江金華人洪武間任廣信知府持躬廉潔課諸  
生甚嚴務臻成效民常病涉修橋便之至今郡人論前  
守之賢者必首稱中云

明一統志

徐良弼字子中南直隸懷遠人洪武初知寶溪縣事時  
兵革甫定百姓流亡者未歸良弼撫綏休息始漸復業  
乃請除賦外雜科以拯民瘼不從輒至府涕泣言之遂  
得告免民困以蘇

豫章書

朱陵南直隸揚州人洪武初知玉山縣事兵革之後閭  
井蕭然陵夙夜勤勞盡心養民之政流散者皆復歸業  
百廢具興邑號爲治

明一統志

趙景純福建閩縣人洪武閒由儒士任上饒知縣性廉  
介不避權要修學校治津梁理民事如家事卒於官

嘉靖

林志

劉琢洪武初知弋陽縣事創建公署定賦役之法務得

其平民永以爲便

廣信府志

張迪陝西鳳翔人洪武三十年進士由御史左遷弋陽知縣廉明仁愛吏畏民懷後因前任事被逮縣民千餘人赴闕陳奏得宥還焉

豫章書

王袞字中美福建閩縣人博學強識有文名洪武中以國子生領應天鄉薦知永豐縣事蝗災禱於神數日蝗皆死政暇則詣學課諸生親爲講解士多所成就永樂中朝京師與修太祖實錄擢翰林院修撰改漢府紀善

卒

福建通志

朱原貞字季常南直隸婺源人建文二年進士永樂間任廣信府同知政事文學爲眾所推許嘗修郡學勸士愛民人懷其德卒於官郡人無少長皆流涕

明一統志

錢性字士復浙江台州人永樂間知廣信府事法制詳

明禮教興舉丙申郡大水發公帑以振全活甚眾

嘉靖林志

鄭庸福建德化人永樂初知鉛山縣事剛介不阿措置

有度民愛而信之有事以手札召無後期者

明一統志

周宗昕浙江鄞縣人永樂中知玉山縣事嚴以制吏寬

以恤民不事苛察而大小之獄民自輸情鞭扑幾廢不

用

據廣信府志補

徐士宗浙江山陰人永樂中知貴溪縣事縣圯於水土

宗重建縣治民困積逋奏折絹布田地坍決奏免稅糧

歲饑捐俸倡振民戴其德宣德六年三考俱最民詣闕

乞留詔增二秩還任

明史循良李信圭傳豫章書

孫珪福建侯官人宣德閒任鉛山縣尉清勤慈惠民懷

服之秩滿民赴京乞留遂擢知縣事前後在鉛山幾二

十年嘗手植松於庭皆林立見者以比甘棠云

廣信府志

鄧容字伯昂廣東樂昌人正統七年進士知永豐縣事  
新學課士教民以農桑水利爲先賊葉宗留犯饒州都  
御史張楷檄往禦之兵潰或勸之走容不可見執不屈  
死景泰中巡撫楊甯韓雍具其事以聞贈光祿卿賜諡

忠毅

一統志  
嘉靖林志

姚堂字彥容浙江慈谿人正統四年進士景泰閒知廣  
信府事政尙簡易嘗錄一郡先賢爲立祠肖像置祭田

訪其後人以奉祀之治行爲江西第一

嘉靖林志  
浙江通志

陶銘字汝器武功衛人天順元年進士知永豐縣事爲  
政平易而務抑強梗民畏而懷之卒於官幾不能舉喪

民爭泣賻焉

嘉靖  
林志

吳澹字源深廣東增城人天順元年進士知弋陽縣事廉介不阿門絕私謁嘗集諸生講學置義倉儲粟萬石抑鎮守中官使不得爲虐旦暮秉燭視事自奉泊然惟冀民有蓋藏而已成化中賜敕獎勵後遷饒州府同知

據一統志廣信府志補

陳惠福建龍溪人成化間以御史出知廣信府外和內剛以愛民爲志嘗舉右族公正耆士十六人優禮之與謀郡政未三年政平訟理卒於官隨侍止二僕十六人者爲治其喪以歸

豫章書

王翰字廷舉湖廣蘄州人成化間知廣信府事剛正恥阿附惟義是從以故多觸忌僉事陳騏按部稽察苛細翰不爲動會大理卿夏時正巡視江西以陳言罷之百

姓乞留至十三疏格於例不可時論皆爲之歎惜

豫章書

張曷字仲明浙江慈谿人成化八年進士授鉛山知縣性剛明善治獄有嫁女者及壻門而失女互以訟於官不能決曷行邑界見大樹妨稼欲伐之從者言樹有神不可伐曷不聽率眾往伐有衣冠三人拜道左曷叱之忽不見比伐樹血流出樹閒曷怒手斧之卒仆其樹巢中墮二婦人言狂風吹至樓上與三少年俱其一卽前所嫁女也有巫能隱形淫人婦女曷執巫痛杖之無所苦已竝巫失去曷馳縛以歸卽巫背鞭之立死乃盡毀諸淫祠寡婦惟一子爲虎所噬訴於曷曷與婦期五日乃齋戒祀城隍神及期二虎果伏庭下曷叱白孰傷吾民法當死無罪者去一虎起斂尾去一虎伏不動曷射

殺之以畀寡婦一縣稱神君鉛山俗婦人夫死輒嫁有  
病未死先受聘供湯藥者曷欲變其俗令寡婦皆具牒  
受判署二木曰羞願嫁者跪之曰節不嫁者跪之民傳  
四妻祝誓死守舅姑給令跪羞木下曷判從之祝投後  
園池中死邑大旱曷意有冤獄齋宿神祠夢婦人泣拜  
覺而識其里居姓氏往詰其狀及啟土貌如生曷哭之  
慟曰殺婦者吾也爲文以祭改葬焉天遂大雨諸異政  
多類此擢南京御史累官至四川副使引疾歸

志

明史  
南波府

陳裕字孟寬福建莆田人成化八年進士知永豐縣事  
爲政廉明勤於撫字不以寵辱介懷都御史高明稱爲  
廉吏以詩美之秩滿卒於家其子至不能舉喪

豫章  
雪



陳勉浙江黃巖舉人任廣信府學訓導學養深邃善爲諸生辨質疑難性孝而廉生徒以費見者一介不取擢桐城令去諸生致贐盡卻之

廣信府志

任泰字亨伯浙江嘉善人成化十一年進士授上饒令爲政知大體不事操切嘗立法清田以杜爭訟增置學舍親爲諸生講授創浮梁益社倉百廢罔不舉焉任滿以治行徵卒於京

據廣信府志  
浙江通志補

汪澐字源潔南直隸績溪人成化十四年進士知玉山縣事寬簡宜民性儉約每食糲粥而已嘗以事出逾期未回妻子皆乏食丞聞之饋以米力卻不受尋擢南臺

御史

豫章書

盧格字正夫浙江東陽人成化十七年進士十八年知

貴溪縣事仁以臨民介以持己風教既樹吏畏民懷乃  
恢庠序以集生徒修陂障以防澤洳葺郵舍治道涂營  
立社倉儲穀數萬歲侵不能爲害擢監察御史

廣信府志 貴

溪縣志

丁璣字至夫南直隸丹徒人成化十四年進士授中書  
舍人以直諫謫普安州判宏治閒遷廣信府通判以敦  
化善俗爲務自奉澹泊終始不渝以憂去

豫章書

孫景雲

一作靈

字時望浙江上虞人宏治十二年進士知

玉山縣事以廉能稱政績茂著未幾卒於官妻鍾氏哀  
毀自縊有司奏旌其節人謂景雲刑于之化云

豫章書 玉山

縣志

卞諶字信卿浙江嘉善人宏治十五年進士授廣信府

推官爲人機警決獄公明嘗經鉛山嶺道有臥屍其夜夢一人如傭者狀謂爲其主所殺密訪得之竟抵罪郡有巨室殺人匿屍窟室中獄久不決譴廉知其處發屍驗之遂伏辜郡中稱爲神明嘗謂姑息適以養盜乃嚴鉤捕盡得宿盜寘之法一郡盜絕尋考績入京還卒於塗貧至鬻裝以斂聞者惜之

浙江通志

朱嘉會字亨之南直隸寶應人宏治十五年進士正德七年知廣信府事值姚源盜熾朝命大將統邊兵及諸道士兵勦之駐郡城百姓騷然嘉會撫綏經略省科徵簡徭役察屬吏之勤惰事理民安先是附郭上饒歲役夫六萬人民不堪命嘉會循知縣張嶺舊制省夫五萬有奇民大悅

豫章書

曹琥字瑞卿南直隸巢縣人宏治十八年進士正德閒以戶部主事直諫謫尋甸通判再遷廣信府同知甯王暨鎮守中貴託貢獻頻有徵斂琥攝府事堅持不予士民德之擢鞏昌知府未任卒貧無以爲斂嘉靖初贈光祿卿

明史周廣傳

豫章書

譚縉字廷儀湖廣長沙人正德閒知永豐縣事爲政嚴明邑有點民倚死人誣脅爲利有司不能鞠罹害者輒破家縉至按得其狀民皆神之修築平陽諸屯堡汰官軍糜費條上監司請奏革稅課又善治盜盜屏迹閭閻

肅然

廣信府志

杜民表字望之浙江嵯縣人正德十二年進士知鉛山縣事宸濠之變決策捍城民恃以無恐歲饑設法振撫

又請給郡儲以濟境內遂安擢御史

鉛山縣志

范永鑾字汝和湖廣桂陽人正德九年進士任貴溪知

縣時劉瑾用事正賦外多雜科宸濠又歲取茶牙民甚

擾永鑾每裁抑之不畏強禦又嘗潛北鄉河以興水利

築南鄉陂以禦水災邑人賴焉擢監察御史

貴溪縣志

施仕浙江湖州人任廣信千戶所吏目正德十四年宸

濠之變賊黨數百人掠永豐欲從閒道趨閩仕時充巡

捕官追至永豐雙山遇賊力戰被執不屈死

廣信府志謝志原

案王守仁敘平宸濠功廣信知府周朝佐與馬各志俱不載無從采其事蹟附見於此

秦遜字敏卿山東嘉祥人任廣信所守禦千戶材識練

達儀度雅飭溫然若書生初典操備領屯糧料理周悉

弊革而士安之尋掌所篆先是應辦軍需取之餘丁吏

緣爲奸利遜酌隸籍者之貧富而上下之立爲定法由

是數十年培克之弊剗除殆盡

據廣信府志補

鍾城字文獻浙江瑞安人以例貢入太學授鉅山縣丞

六年考績擢本縣尹清謹一節不畏強禦以忤上官引

疾歸

據廣信府志浙江通志補

鄧尙義湖廣永興縣人正德九年進士任廣信府推官

嘉靖元年署貴溪縣事當攢造令下民間有田匿稅者

壞違則者戶逸調者黠胥之鬻奸者咸得自發以免怙

終者刑旣乃悉案故籍互察而遞覆之剔弊殆盡邑人

爲作平賦奠民頌萬戶同春卷以誌之

據廣信府志補

徐申南直隸崑山人嘉靖中知上饒縣事境有銅鐵二

山奸民時開采滋患申力遏之俗佞神喜訟迪以教化

俗爲之變

據一統志補

季本浙江會稽人正德十二年進士以御史建言謫揭陽主簿升知弋陽縣視政明決修學宮置祭器政暇則進諸生講習士民至今不忘

戈陽縣志

徐浦福建浦城人嘉靖三十二年進士知弋陽縣事明敏果決卓有政聲先是興安之未建邑也處州流人錯居境內以陶器爲業性頑悍遇歲歉相聚爲變剽掠特甚浦擣其穴擒其渠魁置諸法民賴以安

據廣信府志補

陳仕字小室湖廣黃岡人嘉靖閒由舉人知弋陽縣事時閭浙有倭警客兵騷動迫鄰壤邑素無城民咸震恐仕撫循既定卽請建城葺月竣事保障之功自此始

弋陽縣志

沈陽字子復南直隸上海籍嘉定縣人嘉靖二十九年進士除南康府推官擢撫州同知俱有惠政會信州旱寇相仍院司殷求良牧奏以陽知廣信府事既至戒侵擾斥苞苴釐弊燭奸獄訟惟允豪民奪水利畜牧踐禾稼情民持酒肉易稻麥皆禁止之郡大治嘗承檄爲錢糧條編及驛傳兩議洞悉民隱蠲苛滌煩論者以爲良法美意雖千載不可易也以勞謝事歸

據廣信府志補

管景字子山南直隸上元人嘉靖中由貢士授廣信府檢校以才權永豐縣事又權上饒橫峯密民作亂奉檄往宣布德威羣盜悔過殺其魁以獻民乃安爭爲像以

祀於家

江南通志

程有守字彥平南直隸歙縣人萬厯二年進士知弋陽



縣事值丈田之役豁貧民虛糧無算深山窮谷皆被其澤纂修邑志捐俸成江邨橋以濟行人民德之名橋曰

程公立祠溪側以祀

據廣信府志補

周日甲福建晉江人萬厯閒由舉人知玉山縣事明敏練達興廢舉墜邑中萬柳州石龍橋諸故蹟皆其所修

云

玉山縣志

錢應斗浙江餘姚人舉人萬厯中知玉山縣事邑時苦驛遞應斗節馬遞均夫役不煩箕斂而賓至如歸勸農桑別疆界築橋梁濬溝涂致麥穗兩岐之瑞

據廣信府志補

伍袁萃字聖起一字道聚南直隸吳縣人萬厯八年進士九年任貴溪知縣抑豪強察奸宄雖世家貴族凜凜以三尺繩之不少假借尤加意庠序增置學田四百二

十畝有奇造禮樂器九百二十有五擢兵部主事

明史 徐貞

明傳 貴 溪縣志

陳映福建海澄人萬厯八年進士知鉛山縣事前令以嚴爲治映至更濟以寬決獄片言事無冤濫民亦罔敢作奸徵賦以季爲稽一里之賦輸八者季取其二輸四者取一教民自輸民皆應期而集士子有以事干者則曰若第讀書親賢友耳公家事曲直自有法在若何與焉以治行行取改德州管倉主事

據廣信府志補

劉一貫字省吾浙江分水人萬厯十三年由選貢授興安知縣時建縣未久廟學諸事一貫皆經始成之又纂輯志乘以資考鏡民大和會尋以內召去繼之者郎文煥字景愚亦分水人嘗請增諸生員額令與他邑等興

安人感其德與一貫埒云

興安縣志

陳九韶字宗舜浙江平湖人萬厯十七年進士由刑部主事出知廣信府太監潘相欲開封禁山之礦檄上饒縣集官民諮訪九韶極陳不便相恫以朝旨正色對曰封疆之臣計百姓安危不計一身利害今以一身易百萬生靈之命固所甘也相氣奪九韶尋言之兩院繪圖

陳疏事得寢民祠祀焉

據廣信府志  
嘉興府志補

盧謙字吉甫南直隸廬江人萬厯三十二年進士授永豐縣令邑舊有大仙馬駿等陂久傾廢謙按視故迹壘石爲隄引溪水以備旱涸民食其利

廣豐縣志

錢邦偉南直隸鎮江人舉人萬厯三十六年知貴溪縣事縣有南北兌糧歲僉糧長解運當者輒傾家邦偉核

糧數請人貼運費三分委官收解民不擾而事集至今

爲良法

廣信府志

李光春字元甫浙江樂清人徙居永嘉登萬曆四十四年進士任廣信府推官黔國公遣官來祭遠祖因奪國產及懷玉書院人莫敢爭光春牒上撫按悉反所侵產輿聞於朝擢御史疏論魏忠賢罪迂旨奪俸尋出爲九江兵備崇禎朝厯福建江西河南藩臬所至有聲官至都察院左僉都御史署院事

浙江通志

謹案光春厯任二司謝志失載浙志但

諱言之無由別其爲藩爲臬故不列崇禎朝表

何京四川內江人天啟間由舉人授玉山知縣性廉峭剔蠹務盡時詔建魏忠賢生祠府檄科玉山百五十金京曰安有朘百姓脂膏奉中貴者乎卻不應幾獲奇禍

太守蔣如奇力庇之得免後以卓異徵玉山縣志

徐之垣字心韋浙江鄞縣人天啟五年進士授永豐知

縣丁卯夏大旱秋檄入關之垣辭之甚苦有鹿鳴可聽

鴻哀不可聞之語會秋糧少額上官有煩言民間之爭

先輸納一日遂過其額明年入覲調繁吉水民皆遮道

以留不忍其去廣豐縣志

江夢鶴字菊裳南直隸懷甯人萬厯舉人崇禎中任廣

信同知平居以經濟自命流寇交訐夢鶴按戚南塘遺

法勒伍選才以儲可用署上饒玉山鉛山諸縣發奸摘

伏政紀肅然江南通志詳案廣信府志無江夢鶴傳

淫刑無停言民大噪迫之出奔而泣要日高代理則夢

鶴當日頗不協與論然思民無知寬則易誣嚴則生怨  
未知夢鶴果以嚴致毀抑別有苛於民者在邪舊志采  
江南通志列傳非鄉曲小言之比由來已久今姑仍之

吳鑄字鼎吾浙江秀水人崇禎十年進士授廣信府推官廣信界浙閩深林邃谷盤亙八百里爲羣盜藪時盜已蹂躪五郡方會勦撫按知鑄才檄監軍事會陳子龍以紹興推官監浙軍與鑄合謀攻破之又平鉛山無爲教妖賊張普微撫按敘功上不報善折獄有夏言後裔及艾南英受誣事皆爲之昭雪當世稱其平允福王時官禮部主事南都亡累微不起卒於家

據廣信府志  
嘉興府志補

胡甲桂字秋卿南直隸崑山人崇禎十二年以副榜授南昌通判遷廣信同知至則南昌袁州吉安俱不守廣信止疲卒數千人士民多竄徙會黃道周以募兵至相議城守已而道周敗歿勢益孤咸勸之去甲桂以死自誓力支半載城破見執自經死

白志

江右志卷三十二 廣信府  
謹案舊志有陸康稷廖汝健二傳康稷已見吉安府志  
續錄汝健已見贛州府列傳今茲從刪

### 國朝

郭永靜奉天人順治初由教習知上饒縣事值金聲桓  
之叛永靜綢繆措置民始得安亂定後搜獲僞兵株連  
頗眾永靜詳察情僞多所全活升紹興府同知

安志

扈標字岱瞻山東臨淄人順治三年進士四年知永豐  
縣事金聲桓之叛標誓死捍城偵武弁李萬年通賊狀  
密揭誅之城得無恙兵燹後戶多逃亡標詳請除荒民  
始獲復業

廣信府志 詳案永豐  
即今廣豐時未改名

張聖溥字佳濱陝西富平人舉人順治十年知玉山縣  
事有以御物過剛戒之者聖溥曰吾所恃無欲故不嫌  
剛耳故事上差至玉山橫索無度至是憚聖溥剛正畢

其任無敢恣肆者

廣信府志

王應泰字旋鶴湖北孝感人順治開以明經令鉛山勤敏和惠力除弊政邑自設屯政有田入屯而糧仍民戶者應泰力爲辨之民得不擾

安志

杜良祚直隸沙河人順治四年進士知弋陽縣事爲政敏決土寇陳元貫嘯聚攻掠良祚親率民兵密授方略一戰殲其渠散其脅從民賴以安

弋陽縣志

曹淑貞字震一直隸真定人順治開任永豐知縣建縣治修學宮賦羨不以自私以抵民欠嘗奉徵練餉民已納者七白金已而奉詔蠲免淑貞立召民具領悉以還之後乞病歸民立石紀其德

廣豐縣志

黎士宏字媿曾福建長汀人順治舉人康熙元年任廣



信府推官莅事精敏刑獄多所平反尋署玉山縣事時  
邑甫定居民僅四五十戶士宏至招集流亡撫綏兵役  
凡營舍民房文廟縣署皆興修之丈畝除荒兵民皆賴

焉

廣信府志

高夢說字易庵山東費縣人拔貢生康熙七年知廣信  
府事修文廟治河梁輯府志政不便於民者皆蠲之五  
年而郡大治

廣信府志

譚瑄字左羽浙江嘉興人舉人康熙中知弋陽縣事時  
邑經閩變瑄多方撫集開墾荒田數百頃增市廛二百  
家課士愛民治行稱最擢工科給事中

弋陽縣志

潘士瑞字子璧奉天錦州人康熙十八年知鉛山縣事  
時山賊盤踞勢甚熾士瑞具糗糧繕衣甲募死士授方

略馘斬二百七十餘人生獲九人連拔其寨賊悉平

山銘

縣志

齊贊辰字振乾直隸高陽人康熙十八年任永豐知縣下車以滅賊爲首務嘗練鄉兵爲戰守計斬劇賊江拐子等餘孽悉潰散乃招流遺闢荒土不期年而邑治

豐廣

縣志

余毓浩浙江諸暨人康熙二十年任玉山知縣兵燹後瘡痍未起毓浩慨然以招徠撫恤爲己任清慎勤敏百廢具舉重建學宮及東津橋復懷玉書院罷免獵戶柴薪諸陋例興革皆合時宜焉

玉山縣志

鄭一洪湖北黃岡人舉人康熙二十七年知貴溪縣事承平之始田多荒蕪已蠲者吏猶責償不已一洪至盡

取逋負冊焚之奸胥震懼搖手戒勿犯邑地處衝要驛傳疲於奔命有要人呼索夫役勢張甚一洪徐出語之曰貴溪人初還鄉井葺茅壑田不暇給令請代役可乎免冠而往要人慚謝罷去民德之肖像城隍廟以祀至今見者猶肅然稱爲鄭佛

廣信府志

張國楨字覲公順天寶坻人監生康熙三十三年知廣信府事操守廉正力除漕糧積弊民困以紓廣信界連閩浙奸宄伏藏商船動遭寇劫國楨捕誅盜首十餘人由是行旅皆獲安謐會大饑米價翔涌奸民爭奪富家穀勢猖甚國楨嚴捕治之而捐資糴鄰郡米平價以糴全活者無算在官十年以望誤解任去官日有貧民持雞黍來餽卻不受其人泣曰民昔無賴以公令嚴遂不

敢爲惡轉而力備今雖貧得保首領者公賜也曷敢忘

言已泣下國楨亦爲之嗚咽不置云

廣信府志

甄昭山西平定州人康熙三十六年進士由庶吉士改知玉山縣事東門外黃坂有田二十五頃久荒賦無從出昭從耆民徐文俊等請築上流石壩百餘丈躬自督造壩成引水灌溉雖旱不災歲獲穀以萬計至今深沐

其利

廣信府志

蔣遠字令三浙江諸暨人康熙二十一年進士四十一年補鉛山令鉛山多流民居山谷中藝麻爲業舊有蓬長每恃眾不法遠至稽其籍束以保伍去蓬長之號匪僻莫容地方始靜閭人挾巫蠱術潛伏鉛山貴溪間施毒殺人被害者甚眾遠捕其巨憝置之法害乃息邑胥

多冗濫悉汰去之止存任事者數人奸源以絕罷陋規

精聽斷崇節義禮儒生一時有金玉君子之譽

廣信府志

張天彝山西定襄人舉人雍正十二年自星子令調署

廣豐縣事初下車卽以禁吏擾民自矢徵銀杜苛取許

兩取錢三文以供食飲米則平其斛概溢者以還諸民

由是吏胥無所得多自免歸治事必於堂皇嘗呼老者

至前諭以務本力農爲子弟率反復累千百言民多從

其教尤善燭奸獲賊荷以校綴鈴四隅環琅然令晝夜

巡街市相捕捉必獲他賊始釋之豪猾逞奸者陰訪而

識其名遇事猝加懲治若疾雷奮迅人人驚以爲神在

官六年治行爲江西第一

廣信府志

汪文麟字遇聖江蘇陽山人拔貢生乾隆三年由興安

知縣調知上饒和厚易直居官無赫赫名獄訟催科一

歸於平允修學宮輯邑志平糶振饑士民深德之

廣信府志

彭之錦字學製貴州安化人舉人乾隆七年知貴溪縣  
事性簡約嘗以公事詣鄉獨騎瘦馬前導二人而已邑  
有強暴父子七人居深山中號七虎之錦廉得其實思  
以計擒之會武生某以七虎取禾事來訴之錦佯批斥  
不許俟虎子至縣辨遽執而繫之獄又數日府司解二  
犯至皆虎子蓋之錦度其必上控豫馳稟以聞也一邑

患遂除

貴溪縣志

秦勇均字健資一字柱川江蘇金匱人乾隆四年一甲  
三名進士授翰林院編修十五年知廣信府事廉明勤  
幹日坐堂皇以聽訟民無不自輸其情者刁民某以事

當坐罪鞠之不承被以刑執辨如故勇均乃自詣獄中  
委曲刺得之案遂定吏民皆駭服性嚴介不可干以私  
獨禮遇諸生訓迪之無異師保暇輒至書院有執經問  
難者皆一一剖析各厭所欲以去官至陝西按察使廣  
府志

劉埴字梧川山東諸城人舉人乾隆二十七年由弋陽  
縣調知上饒縣性剛正遇大利病大冤獄往往與上官  
爭之必得當而後已在官八年以從弟墉任江西鹽道  
引嫌改官瀕行或餽以贐埴曰吾自服官以來歲頻稔  
邑無大獄大府皆清廉吾廉俸所入寬然有餘諸君無  
以贐爲也卻不受尋升通政司經歷引疾歸卒廣信府志  
李夢璫江蘇嘉定人乾隆七年進士二十七年署弋陽

縣事廉潔方正燭事如神明詞訟數言立決無所牽引  
兩造皆叩頭謝去性彊識人一見久猶不忘嘗獲盜曰  
汝非某案中某某邪觀者皆驚服時有李青天之號

府志

謝世應湖南耒陽人舉人乾隆二十八年知廣豐縣事  
邑民健訟投牘者恆數百人不勝則上控郡庭無虛日  
世應精於聽斷自朝至於日中昃刻十案爲度無不得  
其情者訟以是簡受牒之日赴訴者七八而已善治盜  
邑城四門門守以捕役二人報竊者計賊若干期以五  
日必獲不獲罪捕役十日不獲罪尉吏五日不獲遂自  
罰也而先給事主贓值之半捕役卒無敢隱賊者先是  
廣豐多盜至是皆相率遁去曰無趁謝家墟也坐前任



瀘溪呈誤事去官遂歸不復仕廣信府志 謹案世應

廉明善斷杜請託拔單寒士民懷愛見建昌府志

李順理字中行河南杞縣人舉人乾隆三十二年署弋

陽縣事居官廉潔獄公平遇事單騎往鄉不以騶從

爲民擾尤留意命牘嘗曰關毆殺人雖誤猶擬抵又傾

其家吾不忍也自盡之案苟尸族誣控當場可立剖辨

必拘兩造入城則教唆慝惡者眾矣是重自困也時以

爲名言廣信府志

康基淵字南圃山西興縣人乾隆十七年進士四十五

年任廣信知府治獄善得情一訊而決境內肅然修信

江書院倣經義治事法以教諸生建藏書樓葺萃萃籍

爲藏修息游之助其成就人才不斤斤於帖括而已重

纂郡志未成而歿時論惜之

廣信府志

李德樹字培之福建閩縣人舉人嘉慶六年由樂平調知上饒縣事性勤敏昧爽卽起閱案牘至日昃不倦嘗剖竹作大杖榜曰宵小肆竊及擾害閭閻者以此杖之民咸肅然明年歲旱穀貴有以被掠訴者德樹慮富民過糶不卽理先往紳耆家委曲諭以平糶事既定乃杖羣不逞者數十人人咸服其識

廣信府志

程鶴年字其言安徽績溪人監生

官冊作直隸永年舉人誤

管攝廣

信府篆兩月判結百餘案民心悅服厯署鹽法道吉南

贛甯兵備道所至修學恤士政聲洋溢

安徽通志

銘恩字禹民漢軍鑲黃旗人嘉慶十四年進士改翰林院庶吉士道光初由編修出知南安府計平會匪民立

祠以祀旋守吉安有疑獄久不決廉得其情置囚者於  
法案乃定民以水災譁捐廉撫卹四境帖然六年調知  
廣信府立義學創雙桂書屋修信江鵝湖靈山三書院  
延名師訓迪之增膏火嚴課程每試必精校拔尤者令  
讀書署中講論經義之餘常以敦品勵行爲勸先後登  
科第者數十人守郡十年百姓歌思其德至今不衰廣信

府志

陳述賢字少彭山東濰縣人舉人道光十五年知貴溪  
縣事以除暴安良爲志折獄尤明允遇輕生圖詐之案  
必鞠實重懲之政肅心慈吏民懷畏比歲旱蝗躬督田  
夫驅捕又虔禱於神一夕大雷雨蝗盡死其至誠感神  
如是廣信府志

鹿傳先字進軒直隸定興人舉人道光中以知縣分江西委理獄局以善折獄稱著德興令權南昌府同知會清江民聚眾抗漕傳先往攝令事至則密獲其魁痛懲之而減積年官吏浮收之數民大悅服事立漸十四年補長甯調知贛縣治水災不俟請發穀以振捕盜明賞罰善駕馭役不參盜行旅以安調廬陵擢南昌府同知二十一年署廣信府事時海氛不靖頻有警報傳先增練勇儲守禦捐俸修城民恃以無恐餘干煤匪滋事抗差毆官糾眾據山口縣令以民變聞傳先奉檄率兵往察知由胥吏苛徭謀於軍將挈一僕往諭眾持械蜂擁至傳先大呼曰吾前德興令某也速來前吾活汝眾愕眙旋跪於道因令導入山徧諭邨眾悉撤備甫三日邨

民擒首從三十餘人以獻不血刃而難平督撫以循良疏薦未入

疏遽卒

廣信府志

羅洪賡字麓泉湖南清泉人道光十六年進士二十年任廣豐知縣明惠有治才聽斷平允讞成雖黠者不欲以險健終邑素有溺女停柩之習洪賡曰生不育死不育此爲政之過也乃爲文以曉之設法拯濟其風少息又採邑中節孝未舉報者六百餘人申請建總坊以旌之激揚風化有古君子之盛心焉

廣豐縣志

史致諤字士良一字鐵生順天宛平人道光十八年進士改翰林院庶吉士二十八年由編修出知廣信府下車卽加意造士民胥悅之咸豐三年兵荒游至致諤令

富者毋遏糴貧者毋強奪強奪者有誅乃捕一二不逞者置於法遠近肅然是時粵賊方攻會垣郡當設防而資用苦竭致謬截留浙餼以濟之一時人心賴以安定

調知南昌府官終浙江甯紹台道

廣信府志

洪立成江蘇儀徵人監生性敢勇知大義道光二十九年任貴溪縣丞咸豐五年粵賊至德興將乘虛以襲廣信立成率鄉兵二百赴郡助防或以賊眾我寡危之奮然曰兵雖少猶勝空城也棄城以與賊我何甘焉上饒令蔡中和聞而壯之與共登陴守俄而賊大至繞城數匝立成擊斬其魁士卒咸奮卒以力竭而死中和浙江山陰人由信豐令調署上饒事城陷爲賊所執遇害以知府例

賜卹予建祠

廣信府志

安常字怡之漢軍正白旗人貢生任奉天府蓋平知縣有循聲擢遼陽知州坐事鐫級謫玉山縣太平橋巡檢咸豐八年七月粵賊圍縣城居民勸之去不從十九日別賊自浦城至突入其署安常懷印端坐賊殺之燔其尸而去事

卹卹贈如例

廣信府志  
檔案

胡定國字壽巖廣西永甯人性忠勇從官軍追勦粵寇有功積官至叅將咸豐八年春僞翼王石達開率眾犯廣豐衛州鎮總兵饒廷選檄定國領所部往援時巨寇壓境城小兵單人無固志定國與知縣劉鍾洛嬰城固守間出奇兵擊之逾半月賊以地雷攻南城將陷定國

立堞口禦之大呼奮擊且戰且築城獲全復屢挫賊鋒  
於城外賊遂解圍去邑人德之奉木主以祀其年秋剿  
賊浙之華埠力戰死

賜諡

恭介卹廕如例

廣信府志

謹案舊志有張鳳儀傳鳳儀後官分巡嶺北道守贛州  
有功已列統籍此不重著



江西通志卷一百三十一